

Bloque

Oleiros

Número 6. Epoca 1ª / Febreiro 2009

Impreso postal sen enderezo

“Temos que conseguir nos vindeiros catro anos que Galiza ocupe o lugar institucional que lle corresponde”

Entrevista con Anxo Quintana, candidato á presidencia da Xunta

“O BNG quere facer política para a xente cun proxecto transformador”



Anxo Quintana na Convención Nacional

As enquisas falan dunha reedición do bipartito despois do 1-M. Que papel xogaría o BNG nese escenario?

O que constatan todas as enquisas e, sobre todo, o sentir na rúa é que o BNG vai ascender nestas eleccións. O que queda por ver é canto e agora fica o traballo para que esta ascensión sexa o meirande posíbel. Ésta é a única incógnita que hai que despexar nestas eleccións porque é evidente que o PP non vai gobernar e todos lle outorgan ao PSOE unha representación parecida á que xa ten. A novidade nestas eleccións é o BNG e iso é produto dun traballo moi intenso no goberno e de toda a militancia durante estes anos, que colocou o nacionalismo no mellor momento político da súa historia. Agora o que convén é mobilizar todos os esforzos para aproveitar esta grandísima oportunidade histórica. Ante unhas expectativas así non nos poñemos límites no noso ascenso nin nas nosas pretensións.

Que propostas do programa do BNG serán determinantes na transformación e o avance do país?

Hai tres ámbitos nos que se desenvolve o noso proxecto para a próxima lexislatura. O primeiro é facer política para a xente. Nesta crise económica fálase demasiado dos bancos, da bolsa e das grandes operacións financeiras, e pouco da xente que está no paro, que ten medo a perder o seu posto de traballo, que non durme pensando en como pagar a súa hipoteca. Ésa é a xente que ao BNG lle interesa, para a que queremos

facen política e por iso temos que consolidar o Sistema Galego de Benestar e o Plan Sectorial de Vivenda protexida; por iso é tan importante seguir xerando emprego e fortalecer os nosos sectores estratéxicos como o naval, pondo en marcha o estaleiro de Astano en Fene; por iso é tan importante conseguirmos na próxima lexislatura ter un grupo lácteo que estructure o mundo rural.

O BNG é un proxecto transformador. Non nos conformamos con xestionar o presente, queremos transformar a realidade a favor das maiorías sociais. Queremos pór en marcha un modelo económico diferente ao que sempre defendeu o PP. Hoxe moitas empresas e familias atópanse con problemas para conseguir crédito e por iso é tan importante pór en marcha un Instituto de Crédito Oficial de Galiza, porque é necesario que a Administración Pública cubra ese terreo.

En terceiro lugar, todo o mundo sabe que a presenza do BNG no goberno e a nosa representación en Madrid serviu para que Galiza teña outro papel dentro da política de Estado e temos que conseguir nos vindeiros catro anos que Galiza ocupe o lugar institucional que lle corresponde. Para iso é necesario un Novo Estatuto que recoñeza o noso carácter nacional, dun ámbito competencial ambicioso, con un modelo de financiamento que permita executalo con garantías e que lle dea ao galego o mesmo estatus xurídico-político que o castelán.

Pensa que a coincidencia das eleccións galegas coas vascas pode restar protagonismo a Galiza?

Hai algunhas forzas políticas preocupadas porque, ao coincidir coas eleccións vascas, Madrid vaille prestar menos atención a Galiza. Nós temos que estar encantados por iso. Canta menos atención nos presten desde Madrid, menos barbaridades imos escoitar. A xente sabe que o 1-M o que toca é Galiza, que imos votar para acadar as mellores solucións aos problemas dos galegos e galegas, e esas son as solucións que ten o BNG.



www.bng-galiza.org
Edita: BNG Oleiros

Ana Pontón, candidata número 2 pola Coruña

“O nacionalismo debe ter máis peso para que as políticas de cambio transformador se leven adiante en plenitude”



Coa tranquilidade que dá o traballo ben feito e con moita ilusión. Así é como afronta Ana Pontón esta campaña electoral. A número dous pola Coruña opina que a sociedade galega valora o labor do BNG nestes catro anos e aposta pola necesidade de que o nacionalismo continúe despois do 1-M co seu labor transformador desde o goberno.

Todo apunta a unha reedición do bipartito. Cal cre que será o papel do BNG neste escenario?

Un dos obxectivos fundamentais é que o BNG teña máis representación, máis peso no goberno e, polo tanto, aspiramos a que o vindeiro presidente da Xunta sexa nacionalista. Estes anos demostran que políticas pensadas desde Galiza, sen condicionantes, teñen resultados positivos e así se pode comprobar nas diferentes áreas en que o BNG tivo responsabilidades.

É importante para o futuro do país que o nacionalismo teña máis peso e, polo tanto, que as políticas de cambio transformador que levamos no programa se poidan levar adiante na súa plenitude.

Nestes anos exerceu a portavocía no Parlamento en Igualdade. Que propostas aportará o BNG para a vindeira lexislatura?

Déronse pasos moi importantes na pasada lexislatura. Superouse o enfoque do PP de considerar as políticas de igualdade como algo meramente decorativo.

Destacaría propostas como a creación dunha Defensoría da Igualdade. Será importante á hora de crear ámbitos especializados e independentes na Administración Pública que nos permitan ir atacando as desigualdades. Será un organismo que denuncie as discriminacións e no que as mulleres van ter unha aliada.

Tamén exerceu a portavocía no ámbito de Xuventude

Se algo demostra esta lexislatura é que as políticas de xuventude son algo máis que ideas para o ocio e o tempo libre, que se pode aplicar un enfoque transversal. Hai que consolidar proxectos postos en marcha como a rede de centros Quérote, ou a de locais de Ensaio, pioneiros na UE.

Queremos unha Lei de Mocidade na vindeira lexislatura para que, por vez primeira, estas políticas se establezan con rango de norma. Esta lei pechará moitos dos ámbitos xa iniciados en política xuvenil.

Finalmente, tamén foi portavoz en Medio Ambiente...

Lamentábelmente, moitas das situacións que herdamos do PP non están solucionadas ou ben encarriladas.

Nomeadamente, dúas cuestións. En primeiro lugar, a próxima ten que ser a lexislatura na que o saneamento integral das nosas rías sexa unha realidade.

Cómpre desenvolver un novo modelo de xestión dos nosos residuos. Nesta lexislatura o PSOE optou por dar continuidade ao modelo anterior. Sogama é un edificio no que se intentou facer unha reforma parcial pero está claro que, se o que fallaba era a estrutura, era necesario derrubar o edificio e construír un novo.

Cales son as asignaturas pendentes da provincia da Coruña?

Apostamos pola creación de dúas áreas metropolitanas no actual ámbito provincial. Unha debería ser A Coruña-Ferrol e outra na capital galega.

Na Coruña están algunhas das zonas con máis importancia leiteira do país. Hai un sector lácteo moi relevante que a UE sitúa entre as áreas de maior futuro. É importante o desenvolvemento de iniciativas e o mantemento do contrato de

explotación sustentábel, a orientación de que os fondos deben ir para quen quer producir. Por isto apostamos por un grupo lácteo galego que permita dimensionar o sector.

Astano debe volver á construción naval-civil. Non se podía permitir antes e non é defendíbel que nun momento en que se poderían estar creando postos de traballo se mantecía un veto político.

No caso do Barbanza, Muros-Noia e Santiago, nesta lexislatura sentáronse as bases para o desenvolvemento do chan industrial e debemos continuar nese traballo.

“Sogama é un edificio cun fallo estrutural no que se intentaron facer reformas parciais”

O BNG, comprometido con Oleiros desde a Xunta



Carlos Aymerich, Portavoz do BNG no Parlamento galego, con Fina Quintáns, Portavoz do BNG no Concello de Oleiros

O Bloque Nacionalista Galego ten apostado desde as súas áreas no goberno da Xunta de Galiza polo concello de Oleiros con numerosas actuacións como non se tiña feito anteriormente por parte de ningún goberno.

Desde a Consellaría de Cultura e Deportes temos apoiado certames culturais como o de fotoxornalismo Revela!, o de audiovisual Nova Factory, a creación do festival galego de Cabaré, a celebración da Semana do libro galego e múltiples subvencións a actividades municipais e a entidades culturais e deportivas do concello. O BNG colaborou na restauración do muro do Castelo de Santa Cruz, e recuperou o abandonado estadio do INEF cun investimento superior a 1,5 millóns de euros na súa pri-

meira fase, entre outras actuacións.

A Consellaría de Medio Rural ten investido por primeira vez en Oleiros entre 80 e 100.000 euros anuais na reparación de camiños no rural ademais de impulsar a creación de UXFOR (Unidades de Xestión Forestal) entre as persoas propietarias de monte en Oleiros.

A Consellaría de Industria, Enerxía e Minas ten mellorado o interior do Mercado municipal de Perillo en colaboración co concello e rematado a través de Xestur e coa Consellaría de Vivenda a urbanización do Mesón da Auga, de vivendas de protección, despois de dez anos de atrasos acumulados polos gobernos do Partido Popular. Ademais, desde

a Dirección Xeral de Turismo, está a se a impulsar co Consorcio das Mariñas o Plano Comarcal de Turismo en que está incluído o concello de Oleiros.

Desde a Consellaría de Vivenda e Solo e a través do Plan Sectorial de Vivenda, Oleiros contará con case 600 vivendas de promoción pública con máis de 150.000m² de espazo e cerca de 40.000m² de solo de equipamento nun lugar privilexiado como é Coruxo, ben perto do centro de Santa Cruz, ben comunicado e que xenerará emprego e investimentos económicos sen precedentes no noso concello.

A Vicepresidencia da Xunta de Galiza, que dirixe Anxo Quintana, ten ofrecido o

equipamento para os locais de ensaio, o traspaso de dúas escolas infantís á rede de Galescolas este ano e outras dúas o vindeiro, ademais da construción doutra máis. Está finalizado o proxecto de construción dun grande Centro de Día (80 usuarios) nas Galeras e temos apoiado tamén economicamente á asociación de redeiras de Lorbé para dignificar esta profesión.

Sen dúbida, estas e outras actuacións, constitúen un compromiso efectivo do BNG desde a súa responsabilidade de goberno cos veciños e veciñas de Oleiros, que seguiremos a incrementar na próxima lexislatura co voso apoio nas eleccións do 1 de marzo.

A Consellaría de Vivenda proxecta vivendas e



A construción de preto de 600 novas vivendas protexidas no noso concello anunciadas pola conselleira de Vivenda e Solo da Xunta de Galiza xerará actividade económica e facilitará a creación de emprego no noso conce-

llo. Velaquí unha aposta decidida e responsábel do BNG no goberno galego polo benestar da cidadanía e polo progreso económico en tempos de crise, é dicir, cando máis se precisa.

No BNG de Oleiros consi-

deramos o Plan Sectorial de Vivenda da Xunta de Galiza unha grande oportunidade para o concello por canto permitirá que os veciños e veciñas dispoñan de 592 vivendas protexidas a prezos accesíbeis, e isto



comportará un cuantioso investimento de preto de

24,5 millóns de euros ao longo da vixencia do plan sectorial que se desenvolverá entre 2009-2017.

Saudamos esta iniciativa posta en marcha pola Consellaría que dirixe a nacionalista Teresa Táboas, pois contribuirá a Oleiros con novos equipamentos e creando espazos públicos de calidade dos que tanto precisamos neste concello, ademais de xerar actividade económica e favorecer o mantemento do emprego e a creación de novos postos de traballo, contribuíndo deste xeito a minorizar os efectos da crise en que estamos, crise á que non é allea o noso concello.

Valorizamos tamén as bolsas de solo seleccionadas, xa que apostan pola integración social e por facilitar o crecemento ordenado do concello. Pensamos que as bolsas elixidas acaban coa idea de que a vivenda protexida debe estar en localizacións periféricas dos concellos, e vemos con satisfacción a aposta pola

calidade na situación deste tipo de vivendas, que van dirixidas tanto para as familias con rendas medias como para as máis necesitadas. A actuación prevista no concello por parte da Consellaría de Vivenda será o exemplo dun novo urbanismo de calidade, o urbanismo ao servizo da xente que sempre defendeu o BNG e que neste caso se traducen en 150.000 m² de zonas verdes e 40.000 m² dotacionais onde se poderán situar no futuro equipamentos sociais, deportivos ou culturais dos que tanto precisa Oleiros.

O BNG aposta pola colaboración institucional para que o goberno local sexa receptivo a estas iniciativas e tamén pola implicación do sector privado para o seu desenvolvemento efectivo. Consideramos tamén esta iniciativa como unha ferramenta de planificación de vivenda protexida que, ademais, aposta por dotar os concellos de Galiza de máis calidade de

vida ao incluír novos equipamentos e dotacións, e pola súa capacidade para xerar actividade económica nunha situación de crise.



Fina Quintáns, Portavoz do BNG no Concello de Oleiros, e Xurxo Dopico, Responsábel Local do BNG en Oleiros, no autobús-exposición 'Transformando Galiza' Fina Quintáns, Portavoz do BNG no Concello de Oleiros, e Xurxo Dopico, Responsábel Local do BNG en Oleiros, no autobús-exposición 'Transformando Galiza'

O BNG reuniu máis de 30 veciños e veciñas de Dexo para promover a criación dunha UXFOR (Unidade de Xestión Forestal). O BNG organizou unha xuntanza de veciños e veciñas na localidade de Dexo para contribuír á criación dunha UXFOR coa colaboración da Consellaría de Medio Rural.

Fina Quintáns promove a mellora da zona dos Tornos, fronteira co concello de Sada, ao se reunir coas veciñas e veciños da zona para escoitar as súas propostas.

O bus-exposición "Transformando Galiza" achegouse á localidade de Santa Cruz o pasado ano para mostrar aos veciños e ás veciñas de Oleiros os logros acadados polo BNG nestes tres últimos anos no goberno galego

O BNG de Oleiros solicitou en varias ocasións publicamente e polo rexistro municipal a exposición pública das modificacións do Plan Xeral e a posibilidade de que os veciños e veciñas puidesen realizar alegacións, mais finalmente o PXOM foi aprobado sen que o

gobierno local accedese a realizar a exposición das referidas modificacións. Consideramos positivo que Oleiros conte cun PXOM, mais denunciamos que o goberno local non realizase a aprobación coa necesaria transparencia

O BNG reivindica o uso público da antiga Casa da Xuventude contra unha cesión ilegal a unha entidade privada por parte do goberno local

O BNG participou nas dúas manifestacións reivindicativas en defensa da ría do Burgo e presentou unha moción para a defensa da ría do Burgo que o goberno local non apoiou

O BNG presentou a través dos parlamentarios Carlos Aymerich Cano e Pablo González Mariñas unha pregunta parlamentar para o reestabelecemento do servizo de transporte escolar en diversos centros educativos do concello

O BNG denunciou publicamente a situación de discriminación de diversos comedores escolares por parte da Consellaría de Educación.

O BNG denunciou publicamente o estado do Colexio Isidro Parga Pondal e solicitou que se solucionen as diversas carencias en relación co patio infantil, a instalación eléctrica, a ampliación do colexio, etc.

O BNG asinou os Fondos Estatais de Cohesión porque a maioría dos puntos que incluían estaban tamén no programa do BNG aínda que debería terse convocado a oposición coa necesaria antelación para que existise un maior consenso

O BNG de Oleiros propuxo ao Goberno local que solicite nos PEIM (Planos Estratéxicos de Infraestruturas no Medio Rural) para o ano 2009 se mellore a zona da Regueira entre Sada e Oleiros no que se refire aos sumidoiros, os puntos de luz, as beirarrúas e o saneamento.

Concerto reivindicativo dos locais de ensaio. Diversos grupos de música locais están a traballar para organizar un concerto reivindicativo dos locais de ensaio en Oleiros, pois cóntase xa co material mais non está dispoñíbel o local que debería proporcionar o Concello de Oleiros

O BNG solicitou en numerosas ocasións a mellora no estado do aparcadoiro do Colexio de Canide. Froito de ditas solicitudes na actualidade están a realizarse diversos arranxos neste aparcadoiro.

Fina Quintáns está a se entrevistar con diversas asociacións do concello para coñecer de primeira man as diversas necesidades que existen en todas as parroquias do noso concello. Todas aquelas carencias e necesidades que afectan a cidadanía oleirense serán tidas en conta pola nosa portavoz para os orzamentos deste ano

Un programa para ter máis avances e máis futuro

Autogoberno

O BNG impulsará un novo Estatuto de Nación que protexa os nosos sinais de identidade, garanta a igualdade de estatus xurídico entre o galego e o castelán e asegure as competencias e os recursos financeiros que Galiza precisa. Mentres non se aprobe, continuará o traballo para establecer un marco de relacións bilaterais co Estado e para a transferencia de novas competencias, en especial, as de inspección e seguranza marítima, e as de tráfico e seguranza viaria. Ademais, darase un impulso ás relacións exteriores, promovendo a participación directa ante a UE e dedicando especial atención ás relacións con Portugal.

Medidas económicas

Apostamos pola reforma da Lei reguladora das Caixas de Aforro de Galiza co fin de democratizar a súa estrutura e estreitar o seu compromiso coa economía produtiva e a creación de emprego no país. Creación do Instituto Galego de Crédito. Impulsaremos o sector da construción naval galega, recuperando o estaleiro de Fene para a construción naval civil. Seguirase a impulsar o I+D+i co obxectivo de acadar un investimento do 2% sobre PIB no 2013. No tocante ás TIC, o BNG seguirá promovendo o software libre e estenderá ao 100% do país a cobertura de banda larga e TDT. Esta lexislatura será a da creación do Grupo Lácteo Galego e dunha nova Lei de Montes. O BNG tamén promoverá dun Plano Galego de Pesca de Baixura e Litoral que atenda á recuperación dos caladoiros, á súa explotación sustentábel e a comercialización a prezos rendíbeis.

Benestar e Igualdade

Apostamos por incrementar o complemento das pensións non contributivas. Impulsaranse dos programas de mantemento das persoas maiores no seu contorno, ampliando a cobertura dos servizos de proximidade. Por outra parte, apóstase por alcanzar a ratio de 5 prazas en residencias públicas por cada 100 maiores. O BNG aumentará a rede de Galescolas con 10.000 novas prazas



O BNG aposta por crear servizos de cercanías e xestionalos desde Galiza

e apostará polas medidas efectivas para rematar coa discriminación da muller no mundo do traballo.

Sanidade

Destaca a potenciación dun servizo sanitario público máis eficaz a través da integración do SERGAS das entidades subsistentes (O61, Galaria, Centro de Transfusións de Galiza, etc.) e da promoción da dedicación exclusiva dos profesionais. Alargarse até os 18 anos a atención bucodental básica e gratuíta.

Ensino

Apostaremos por un ensino público e galego. Así, o 6% do orzamento galego debe destinarse a esta área, coa finalidade de incrementar o profesorado e o persoal de apoio no ensino obrigatorio, para reducir o número de alumnos por aula. No referente á Universidade, apóstase pola converxencia coa porcentaxe estatal de gasto por alumno. Dentro do impulso á investigación universitaria, aprobaremos o Estatuto e a Carreira Profesional para o Persoal Investigador.

Infraestruturas e Vivenda

O BNG apostará pola transferencia a Galiza da xestión da AP-9 e das autovías coa meseta. Así mesmo, crearase un Ente Ferroviario Galego para a prestación dos servizos de cercanías nas áreas metropolitanas e urbanas de Galiza. En Vivenda, construiremos 45.000 vivendas protexidas nos próximos oito anos. Así mesmo, promoveremos a dotación de 20 millóns de m² de solo produtivo na vindeira lexislatura.

Cultura, deporte e lingua

Posta en marcha da Cidade da Cultura como axente promotor da produción e innovación culturais, impulsor da presenza internacional da nosa cultura e da protección do patrimonio e mais tamén como activo para o desenvolvemento económico de Galiza. Promoverase a práctica deportiva entre todos os galegos e galegas e impulsarse a presenza internacional das nosas seleccións. Daremos un novo impulso aos procesos de normalización do noso idioma: financiamento e cumprimento efectivo tanto do Plano Xeral de Normalización da Lingua Galega como do Decreto de uso do Galego no Ensino.

Ambiente

Impulso dunha nova política de xestión de residuos a través da reformulación de SOGAMA cara a reciclaxe e a reutilización, combinada coa implantación de complexos de compostaxe de ámbito comarcal. Prohibiranse novos aproveitamentos hidroeléctricos nos xa saturados ríos galegos.

Administración, seguranza e Xustiza

Esta lexislatura será a do despregamento da Policía Galega, coas máximas competencias posíbeis. O BNG promoverá a desburocratización da administración pública e un Pacto Galego pola Xustiza. Así mesmo, aprobarase nos seis primeiros meses da lexislatura a reforma da CRTVG.

O BNG levou adiante en colaboración cos veciños e veciñas unha campaña de demanda de mellora dos accesos á praia da Naval e do seu contorno

Fina Quintáns solicitou ao goberno local a mellora dos accesos á praia da Naval e do seu contorno avalada por máis de 300 sinaturas recollidas entre veciños e veciñas da zona.



Froito das reclamacións que a nosa portavoz no concello de Oleiros, Fina Quintáns, realizou perante o goberno local, avalada por máis de 300 sinaturas recollidas entre os veciños e veciñas da zona, o BNG conseguiu que por fin se expropiase o terreo necesario para adecuar os accesos á praia da Naval e o seu contorno.

Logo do traballo realizado man a man coa cidadanía, denunciando a situación dos accesos e do contorno da

praia da Naval, e manifestándonos na rúa cos veciños e veciñas cando foi preciso, finalmente o goberno de Oleiros procedeu á expropiación de terreos para acometer melloras nos accesos. Só uns días antes de ser publicada no D.O.G. a referida expropiación o alcalde de Oleiros tiña cualificado esta medida como imposible. O alcalde finalmente tivo que rectificar, mais no BNG non consideramos que o problema se resolva só mediante o anuncio da expropiación, senón que a citada expropiación debería ser sempre levada a cabo mediante a negociación coa propietaria e non pola vía forzosa, e, ademais, consideramos que deben ser realizados arranxos nas zonas públicas independentemente da expropiación, cunha partida de 30.000 € recollida nos orzamentos

municipais de 2008.

Neste momento estase á espera de que o Concello coloque dúas farolas na zona, así como de que se manteña limpos os accesos e o contorno. No BNG estamos atentos e esperando que as solucións que foron demandadas por veciños e veciñas aos que nos sumamos nas súas reivindicacións sexan levadas a cabo.

Como contactar co BNG de Oleiros:

Casa do Concello, Praza de Galiza s/nº, 15173 Oleiros
Telefone: 981 610000 Ext. 4403
bng.oleiros@gmail.com
www.finaquintans-bng.org
www.blogoteca.com/bngoleiros

